

आकाशवाणी जयपुर—अजमेर
प्रादेशिक समाचार

- कोटा—बूंदी ग्रीनफील्ड हवाई अड्डो बणावण रा काम री नींव रखी ज्यी —प्रधानमंत्री नरेन्द्र मोदी वां रा संदेश मांय कह्यो — हवाई जुड़ाव व्हेवण ऊं पूरा हलका मांय बरकत रा नुवा गेला खुलेला।
- कोटा—बूंदी ग्रीनफील्ड हवाई अड्डो बणावण रा काम माथे डोढ़ हजार करोड़ रुप्या ऊं बत्तो खर्च आवेला—दो साल मांय बण र पूरो व्हेला।
- राष्ट्रपति द्रौपदी मुर्मू अन्तर्राष्ट्रीय महिला दिवस री पैली वाळी सिंज्यां वां रा संदेश मांय महिलावां सारु बराबर मौका मुहैया करावण बाबत् कह्यो।
- उत्तर पश्चिम रेलवे चालू माली साल रा फरवरी महीना ताई सात हजार आठ सौ दस करोड़ रुप्या री रिकॉर्ड आमदनी हासिल कीनी।
- मौसम विभाग प्रदेश रा लंकाऊ—आतूणी हलकां मांय 10 अर 11 मार्च ने लू बाजण सारु चेतायो।

000

प्रधानमंत्री नरेन्द्र मोदी कह्यो है के हवाई संपर्क ऊं जुड़बा वाळा हलकां रो विकास और तेज व्हे है। वे आज कोटा—बूंदी ग्रीनफील्ड हवाई अड्डा रा भूमि पूजन समारोह मांय वीडियो संदेश रे जरिये बोल रह्या हा। प्रधानमंत्री कह्यो के देश मांय साल 2014 ऊं पैली केवल सत्तर हवाई अड्डा हा, ज्यां री तादाद बध र अब 160 ने पार कर गयी है। वे कह्यो के हवाई अड्डो बणबा ऊं आरे—सारे री नान्ही ठौड़ां मांय ई काम—धंधा अर सैर—सपाटा ने बधावो मिले है अर माली हलचल तेज व्हे है। श्री मोदी भरोसो जतायो के कोटा हवाई अड्डो ई पूरा हलका सारु बरकत रा नुवा दरुजा खोलेला।

.....
जळसा मांय लोकसभा अध्यक्ष ओम बिरला कह्यो के कोटा मांय ग्रीनफील्ड हवाई अड्डा री लम्बा बगत री मांग अब पूरी व्हे रही है। वे कह्यो के कोटा मांय सड़क अर रेल ऊं जुड़ाव सागे बिजली अर पाणी रा ज़रूरी साधन मौजूद है। बिरला कह्यो के कोटा भणार्ई—लिखाई रो केंद्र तो है ही, अब इण ने कारखानां री नगरी रा तौर ऊं विकसित करण री कोशिश करी जा रही है।

.....
कार्यक्रम में मौजूद मुख्यमंत्री भजनलाल शर्मा कह्यो के राज्य सरकार जनता ऊं करी ज्या वायदा तेजी ऊं पूरा कर रही है। वे कह्यो के लारला दो साल मांय सरकार तिहत्तर फीसदी वायदा पूरा कर दीना है अर बच्योड़ा वायदा ई बेगा ई पूरा कर्या जावेला। श्री शर्मा कह्यो के कोटा रे आरे—सारे विकास री केई मोटी परियोजनावां सारु व्हेवण वाळी है, ज्यां ऊं ई हलका रा रेहवासियां री जिन्दगी आसान बणेला।

.....
ई मौके नागरिक उड्डयन मंत्री के. राम मोहन नायडू वां रा संबोधन मांय कह्यो के कोटा—बूंदी ग्रीनफील्ड हवाई अड्डो बणावण रो काम दो साल मांय पूरो कर लियो जावेला। वे कह्यो के हवाई अड्डो बणावण रा काम माथे डोढ़ हजार करोड़ रुप्या ऊं बत्ती रकम खर्च व्हेला। इण ऊं पैली

लोकसभा अध्यक्ष, मुख्यमंत्री अर नागरिक उड्डयन मंत्री हवाई अड्डा री प्रस्तावित ठौड माथे भूमि पूजन कीनी।

000

राष्ट्रपति द्रौपदी मुर्मू अन्तर्राष्ट्रीय महिला दिवस री पैली वाळी सिंज्यां जनता, खासकर महिलावां ने शुभकामनावां दीनी है। वां रा संदेश मांय राष्ट्रपति कह्यो के भणी-पढी अर मजबूत महिलावां मजबूत देश री नीव है। राष्ट्रपति विज्ञान, खेल अर रक्षा सरीखा हलकां मांय महिलावां रा काम री सराहवणा कीनी। वे महिलावां ने विकास रा बराबर मौका मुहैया करावण वाळो समाज बणावण री अपील कीनी। कल अन्तर्राष्ट्रीय महिला दिवस रे मौके राज्य मांय न्यारा-न्यारा कार्यक्रम राख्या जावेला। राज्य स्तर रो जळसो हनुमानगढ मांय राख्यो जावेला, जिण मांय मुख्यमंत्री भजनलाल शर्मा ई शामिल व्हेला। अन्तर्राष्ट्रीय महिला दिवस रे मौके राजस्थान रोडवेज री बसां मांय महिलावां सारू आज आधी रात ऊं काल आधी रात ताई मुफ्त सफर रो सुबीतो मुहैया करायो जावेला। नौ मार्च ने जयपुर री राजस्थान पुलिस अकादमी मांय राष्ट्रीय महिला आयोग री अध्यक्ष विजया राहटकर महिला जनसुनवाई करेला। दस मार्च ने जयपुर मांय राज्य स्तर रो पुलिस सम्मेलन राख्यो जावेला। पुलिस महानिदेशक राजीव कुमार शर्मा री सदारत मांय व्हेवण वाळा ई कार्यक्रम मांय साइबर हिफाजत अर नुवा कानूनां मांय महिलावां री हिफाजत ऊं जुड़या प्रावधानां रा बारा मांय ई विचार कर्यो जावेला।

000

केन्द्रीय कृषि अर किसान कल्याण राज्य मंत्री भागीरथ चौधरी कह्यो है के किसानां ने आगे बधावण सारू प्रधानमंत्री नरेन्द्र मोदी री अगुवाई मांय सरकार लगातार कोशिसां कर रही है। वे आज अजमेर रा केन्द्रीय मसाला बीजीय अनुसंधान केन्द्र मांय राख्यी ज्या 'इंडस्ट्री मीट' अर 'किसान मेळा' मांय बोल रह्या हा। चौधरी कह्यो के देश रा विकास सारू काश्तकारां री बरकत जरूरी है।

.....

कार्यक्रम रे दौरान देशभर ऊं आया कृषि वैज्ञानिक, उद्योगां रा नुमाइंदा अर शिक्षाविद् खेती-बाड़ी रा हलका मांय कर्या जा रह्या नुवा कामां रा बारा मांय विचार कीनी।

0000

जैसलमेर मांय आज ऐतिहासिक दादा गुरुदेव जिनदत्त सुरीश्वर महाराज रो 'चादर महोत्सव' सिरधाभाव अर उमाव सागे राख्यी ज्यो। ई मौके केन्द्रीय संस्कृति अर पर्यटन मंत्री गजेंद्र सिंह शेखावत गुरु परंपरा अर जैसलमेर री वीरता वाळी विरासत री सराहवणा कीनी। ध्यान जोग है के 144 साल रा लम्बा आंतरा पाछे आ दिव्य चादर किला ऊं बाहर लायी ज्यी है।

0000

राज्य री पैली वाळी मुख्यमंत्री वसुंधरा राजे प्रदेश मांय नशीली दवाइयां काम लेवण रा बधता चलन माथे चिंता जताता थकां नौजवानां ऊं नशीली चीजां ऊं दूर रेहवण अर काम लेवण ऊं रोकण मांय सरकार री मदद करण री अपील कीनी है। वे आज जयपुर मांय राख्यी ज्या 'सशक्त युवा-सशक्त राष्ट्र' सम्मेलन मांय बोल रही ही।

000

उत्तर पश्चिम रेलवे चालू माली साल मांय फरवरी महीना ताई सात हजार आठ सौ दस करोड़ रुपया री आमदनी हासिल कीनी है। आ उत्तर-पश्चिम रेलवे बण्यां पाछे हाल ताई री सब ऊं बत्ती आमदनी है। एन.डब्ल्यू.आर. रा मुख्य जनसंपर्क अधिकारी अमित सुदर्शन बतायो के लारला साल री तुलना मांय अ रकम करीब आठ फीसदी बत्ती है।

000

प्रदेश रा लंकाऊ-आतूणी हलकां मांय 10 अर 11 मार्च ने लू बाजण री शंका है। मौसम केंद्र जयपुर रे मुजब आवता एक सप्ताह मांय पारो 2 ऊं 3 डिग्री सेल्सियस ताई और चढबा रा आसार है। आवता तीन-चार दिन मांय राज्य रा लंकाऊ हलका मांय पारो 40 डिग्री सेल्सियस ताई पूग जावण री संभावना है। ई बीचे राज्य रा घणखर हलकां मांय तापमान सामान्य ऊं 4 ऊं 9 डिग्री सेल्सियस ऊंचो चाल रह्यो है। लारला चौबीस घंटां मांय जैसलमेर अर चित्तौड़गढ मांय सब ऊं बत्तो 38 डिग्री सेल्सियस तापमान दर्ज करी ज्यो।

000

फौज री सप्त शक्ति कमान री ओर ऊं चूरु मांय काल गौरव सेनानी समारोह राख्यो जावेला। ई दौरान पैली वाळा फौजियां, वीर नारियां अर वीरांगनावां सारु स्वास्थ्य जांच रो कैम्प ई लगायो जावेला। म्हाणा चूरु खबरनवीस बतायो के गौरव सेनानी समारोह मांय पैली वाळा फौजियां ने नौकरी-धंधा रा मौका मुहैया करावण री कोशिश ई करी जावेला।

.....
0000

भरतपुर नगर निगम मांय स्मार्ट सेवा केंद्र टू प्वाइंट ओ रे जरिए ऑनलाइन तरीका अर्जियां देवण रो सुबीतो सुरु करी ज्यो है। नगर निगम रा आयुक्त श्रवण बिश्नोई आ जाणकारी दीनी। वे बतायो के जनता निगम ऊं जुड़ी योजनावां अर सेवावां रो फायदो लेवण सारु सीधा ई केन्द्र माथे अर्जी दे सकेला। ई रे जरिये खेती री जमीं रा नियमन, पट्टा, भवन बणावण सारु मंजूरी, फायर एन-ओ-सी अर ट्रेड लाइसेंस लेवण सारु ऑनलाइन तरीका ऊं अर्जियां दी जा सके है। ई सागे ई प्रधानमंत्री आवास योजना अर पीएम स्वनिधि ऋण योजना रो फायदो लेवण सारु ई अर्जियां दी जा सकेला। बिजली-पाणी री एन-ओ-सी अर बीपीएल मेडिकल कार्ड मांय नाम जुड़वावण रा काम ई आं कंन्द्रां रे जरिए ऑनलाइन अर ऑफलाइन दोन्यु तरीका ऊं कराया जा सकेला।

000